

A intèndere sos Frantzesos

*Testu de Siotto-Pintor*

*A intèndere sos Frantzesos, issos ant inventadu sa libertade. E puru ant su dispotismu in sas venas e sunt de libertade odiadores cun orgògliu mannu... Finas dae sos tempos de Cesare tale est su populu frantzesu chi no ischit tollerare una libertade sàbia e nemmancu una servitude grae. Abbramidu de libertade e incapatzu de la muntèndere. Zèniu negativu, bonu ebbia a isfaghene, discontentu onz'ora de su presente, solu invariabile in sa frimmesa sua. (G. Siotto-Pintor, La vita nuova, pag. 117)*

In custu testu Siotto chircat de dare a sos Frantzesos una identidade permanente ossiat isse chircat de identificare unu populu ammitinde chi in s'istoria issoro bi siat una ispètzia de sustàntzia frimma (permanente) chi si ripitit in sos annos e chi nde detzidit innantis de su tempus sos portamentos benidores.

Belle gai tale tipu de cunsideratzione est isbagliada ca non tenet contu de sos cambiamentos chi si podent presentare in unu populu pessighidu da eventos (acidentes) istoricos.

A pustis de custu si podet cunfrimmare chi chi Siotto impret in custas cunfrimmas pagu prus a mancu in cussèntzia sua, sa visione de su natzionalismu naturalisticu.

Custu fit unu modu de cunsiderare sa nazione a subra de unos caràteres fisicos comunes a unu populu, a subra de fatores etnicos e de sàmbene chi pro mala sorte nch'essit in portamentos ratzistas.

Personazu esemplare chi cumpartiat custu pessamentu fit Herder chi cunsideraiat sa nazione comente unu fatu naturale, pro sos caràteres fisicos permanentes , a subra de su sàmbene e de sa terra inue cussu sambene determinadu istat atacadu. Duncas in unu sensu ispetzificu Siotto parit compartire sa difesa de su mundu sou dae sos influosos de fora cun sa serrada e s'odiu peri su sàmbene furesteri.

In àteros testos Siotto matessi si mustrat un'intelletuale ativu chi chircat de dare una cussèntzia tzivile de su populu sardu.